



Jadual Pembacaan Khutbah Jumaat Siri 6/2023 (Bulan Jun Tahun 2023)

تاریخ	تاجوق	ب
2 Jun 2023M/ 13 Zulkaedah 1444H	Santuni Tetangga: Membawa Ke Syurga	1.
9 Jun 2023M/ 20 Zulkaedah 1444H	Sempena MTHQK 2023 Al-Quran Sahabat Sejati, Teman Sehidup Semati	2.
16 Jun 2023M/ 27 Zulkaedah 1444H	Sempena MTHQK 2023 Kenali dan Kenalkan Al-Quran: Manual Kehidupan	3.
23 Jun 2023M/ 4 Zulhijjah 1444H	Berkorban Demi Cinta	4.
30 Jun 2023M/ 11 Zulhijjah 1444H	Hikmah Di Sebalik Ibadah Haji	5.
Khutbah Kedua		

دبیایاء:



زكاة فولاو فینغ

دتریتکن:



جابتن حال إحوال اکام اسلام فولاو فینغ

Jawatankuasa
Panel Semakan Teks Khutbah
Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor (Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab (Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Khutbah Sempena Majlis Tilawah dan Hafazan Peringkat Kebangsaan 2023

Al-Quran Sahabat Sejati, Teman Sehidup Semati

(9 Jun 2023M/ 20 Zulkaedah 1444H)

الْحَمْدُ لِلَّهِ الْقَائِلُ : إِنَّ هَذَا الْقُرْآنَ يَهْدِي لِلَّتِي هِيَ أَقْوَمُ وَيُبَشِّرُ الْمُؤْمِنِينَ الَّذِينَ يَعْمَلُونَ الصَّالِحَاتِ أَنَّ لَهُمْ أَجْرًا كَبِيرًا ﴿١﴾ سورة الإسراء

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ الْمَلِكُ الْعَلَّامُ، وَأَشْهَدُ أَنَّ نَبِيَّنَا مُحَمَّدًا عَبْدُهُ وَرَسُولُهُ سَيِّدُ الْأَنَامِ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ الْكَرَامِ.
أَمَّا بَعْدُ؛ فَيَا أَيُّهَا النَّاسُ؛ أَوْصِيكُمْ وَنَفْسِي بِتَقْوَى اللَّهِ وَطَاعَتِهِ لَعَلَّكُمْ تَتَّقُونَ.

SIDANG MUKMININ RAHIMAKUMULLAH,

Dalam perhimpunan yang berkat di *Saiyyidul Ayyam* tika ini, marilah kita perteguhkan ketakwaan kepada Allah **سُبْحَانَهُ وَتَعَالَى** dengan memastikan setiap perintah-Nya ditunaikan dan setiap larangan-Nya dielakkan. Sesungguhnya orang yang benar-benar bertaqwa pasti akan memperoleh hati yang tenang dan jiwa yang lapang.

Sebelum melanjutkan bicara, marilah kita memberikan sepenuh tumpuan kepada kandungan khutbah hari ini. Jangan berbual-bual, tidur dengan sengaja, bermain telefon bimbit dan menggerakkan tabung



kutipan Jumaat kerana ia bertentangan dengan sunnah serta adab. Bagi melengkapi kewajipan solat Jumaat hari ini, dan bersempena dengan penganjuran Majlis Tilawah dan Hafazan Al-Quran Peringkat Kebangsaan di Pulau Pinang pada 11 hingga 16 Jun ini, marilah kita menghayati bicara mimbar yang bertajuk: **“Al-Quran: Sahabat Sejati, Teman Sehidup Semati.”**

SIDANG MUSLIMIN RAHIMAKUMULLAH,

Hidup adalah perjuangan. Perjalanannya penuh dengan halangan dan dugaan. Namun sesulit manapun kehidupan, seberat manapun bebanan dan sesukar apa pun perjalanan, pasti terasa ringan dan damai, jika ada sahabat setia yang sentiasa bersama.

Bagi seorang yang beriman, kitab suci Al-Quran boleh dijadikan sebagai sahabat setia dan teman sejati di dalam kehidupan. Oleh kerana itulah persahabatan seorang muslim dengan Al-Quran tidak ada titik penghujung. Mukjizat agung ini diturunkan oleh Allah untuk dijadikan pedoman dan teman dalam menempuh liku hidup dan perjuangan. Allah berfirman dalam surah Yunus ayat 57:

يَا أَيُّهَا النَّاسُ قَدْ جَاءَكُمْ مَوْعِظَةٌ مِنْ رَبِّكُمْ وَشِفَاءٌ لِمَا فِي الصُّدُورِ وَهُدًى وَرَحْمَةٌ
لِّلْمُؤْمِنِينَ ﴿٥٧﴾

Maksudnya: *“Wahai umat manusia! Sesungguhnya telah datang kepada kamu Al-Quran yang menjadi nasihat pengajaran dari Tuhan kamu dan yang menjadi penawar bagi penyakit-penyakit batin yang ada dalam dada kamu dan juga menjadi hidayah petunjuk untuk keselamatan serta membawa rahmat bagi orang-orang yang beriman.”*

Dunia moden masa kini sedang dilanda pelbagai cabaran dan krisis. Masalah kemurungan sehingga ke tahap cubaan membunuh diri semakin meningkat dan ia pada kadar membimbangkan. Ada di kalangan masyarakat pada hari ini telah hilang pedoman. Al-Quran tidak lagi menjadi pegangan dan ikutan, sebaliknya hawa nafsu dan fikiran menjadi rujukan. Lantaran itulah, mimbar pada hari ini mengajak sidang jemaah sekalian untuk kembali bernaung di bawah petunjuk Al-Quran.

Bersahabat dengan Al-Quran, akan menemukan kita dengan panduan hidup yang lengkap. Bersahabat dengan Al-Quran, akan menemukan kita dengan jalan keluar dari segala masalah. Bersahabat dengan Al-Quran, akan menemukan kita dengan sinaran petunjuk, yang menerangi kehidupan ke arah kesejahteraan hidup di dunia dan kebahagiaan di akhirat.

Al-Quran tidak pernah menyisihkan sebarang isu dan permasalahan kehidupan manusia, baik isu besar mahupun isu yang dianggap remeh. Allah menegaskan dalam surah Al-Jasiah ayat 20 dengan firman-Nya:

هَذَا بَصِيرٌ لِلنَّاسِ وَهُدًى وَرَحْمَةٌ لِّقَوْمٍ يُوقِنُونَ ﴿٢٠﴾

Maksudnya: “Al-Quran ini adalah pedoman bagi manusia, petunjuk dan rahmat bagi kaum yang meyakini (kebenarannya).”

SIDANG JEMAAH YANG BERBAHAGIA,

Keengganan menjadikan Al-Quran sebagai teman sejati, pastinya akan diambil kesempatan oleh nafsu dan syaitan untuk mempengaruhi kita. Apa tidaknya, dua musuh tradisi dulu, kini dan selamanya ini, sentiasa mengintai ruang dan peluang untuk bertindak. Jika ini berlaku,

langkah yang diatur tentulah tempang, perancangan yang disusun pastilah pincang dan matlamat yang digariskan pasti terhalang. Penegasan Allah ﷻ tentang akibat yang menimpa golongan yang meminggirkan Al-Quran sangat menggerunkan. Firman Allah dalam surah Taha ayat 124:

وَمَنْ أَعْرَضَ عَنْ ذِكْرِي فَإِنَّ لَهُ مَعِيشَةً ضَنْكًا وَنَحْشُرُهُ يَوْمَ الْقِيَمَةِ أَعْمَى ﴿١٢٤﴾

Maksudnya: *“Dan sesiapa yang berpaling ingkar dari ingatan dan petunjuk-Ku, maka sesungguhnya adalah baginya kehidupan yang sempit, dan Kami akan himpunkan dia pada Hari Kiamat dalam keadaan buta.”*

SIDANG JEMAAH YANG BERBAHAGIA,

Keghairahan masyarakat kita untuk mendepani Al-Quran sepanjang Ramadhan sebelum ini sangat menakjubkan. Sana sini tanpa mengira masa, kita dapati masyarakat Islam sibuk dengan Al-Quran. Ada yang membaca, ada yang mentadabbur dan ada yang sekadar mendengar. Namun suasana indah ini bertukar menjadi lesu, sebaik sahaja pengumuman 1 Syawal kedengaran di kaca TV. Semangat mula menurun, fokus beransur hilang dan mushaf kembali tersusun kemas tanpa sentuhan.

Mengapa suasana indah ini hanya hadir sepanjang Ramadhan sahaja dan berlalu pergi apabila berakhirnya Ramadhan? Sungguh aneh bukan? Sedangkan mukjizat teragung Nabi Muhammad ﷺ ini diamanahkan untuk kita pelajari, hayati dan amalkan kandungannya

secara istiqamah. Al-Quran adalah bekalan terbaik untuk kita bawa bersama menuju kehidupan yang kekal abadi.

SAUDARAKU SIDANG JUMAAT SEKALIAN,

Dampingilah Al-Quran, baca, pelajari dan tadabbur ayat-ayatnya. Isi kandungannya adalah penawar segala duka dan petunjuk ke jalan yang lurus. Allah **سُبْحَانَهُ وَتَعَالَى** juga menjanjikan ketenteraman hati dan ketenangan jiwa bila kita mengingatnya. Hakikat ini ditegaskan oleh Allah menerusi firman-Nya dalam surah Ar-Ra'du ayat 28:

الَّذِينَ ءَامَنُوا وَتَطْمَئِنُّ قُلُوبُهُمْ بِذِكْرِ اللَّهِ أَلَا بِذِكْرِ اللَّهِ تَطْمَئِنُّ الْقُلُوبُ ﴿٢٨﴾

Maksudnya: *“(Iaitu) orang-orang yang beriman dan tenang tenteram hati mereka dengan zikrullah. Ketahuilah dengan zikrullah itu, tenang tenteramlah hati manusia.”*

Bagi yang masih merangkak-rangkak dalam bacaan Al-Quran, jangan segan dan malu untuk belajar. Carilah guru dan belajarlah daripada mereka. Percayalah, bukan anda seorang sahaja yang tidak lancar, bahkan terdapat ramai lagi yang belum lancar. Faktor usia bukan alasan yang menghalang untuk terus mempelajari dan mempertingkatkan ilmu Al-Quran selagi nyawa masih dikandung badan.

SAUDARAKU, SIDANG JUMAAT SEKALIAN,

Rumusan khutbah yang disampaikan hari ini adalah seperti berikut:

Pertama: Al-Quran sebagai sahabat sejati menuntut kita untuk sentiasa mendampinginya tanpa terikat dengan masa dan tempat.

Kedua: Orang yang sentiasa berdamping dengan Al-Quran dan berpegang teguh dengan pedomannya terselamat dari godaan dan tipu daya syaitan.

Ketiga: Membaca, mempelajari dan beramal dengan petunjuk Al-Quran adalah cara terbaik mengisi kekosongan jiwa dan penyelamat dari perangkap syaitan yang merosakkan diri.

Firman Allah dalam Surah Yunus ayat 58:

قُلْ بِفَضْلِ اللَّهِ وَبِرَحْمَتِهِ فَبِذَلِكَ فَلْيَفْرَحُوا هُوَ خَيْرٌ مِّمَّا يَجْمَعُونَ ﴿٥٨﴾

Maksudnya: “Katakanlah (wahai Muhammad): kedatangan Al-Quran itu adalah semata-mata dengan limpah kurnia Allah dan kasih sayangnya, maka dengan isi kandungan Al-Quran itulah hendaknya mereka bersukacita (bukan dengan yang lainnya), kerana ia lebih baik daripada apa yang mereka himpunkan (dari segala benda dan perkara yang tidak kekal).”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ، أَقُولُ
مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ،
إِنَّهُ هُوَ الْغَفُورُ الرَّحِيمُ.



خطبة كدوا بولن جون

2023M/ 1444H

الْحَمْدُ لِلَّهِ عَلَى الْآلَاءِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَءَنَا وَوُلَاةَ أُمُورِنَا.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،



Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالرُّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنْ سَيِّئِ الْأَسْقَامِ، يَا أَرْحَمَ الرَّاحِمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP). Semoga sumbangan 10% daripada hasil kutipan Tabung Jumaat mingguan dari setiap masjid kepada Tabung Wakaf yang telah ditubuhkan, menjadi saham yang berkekalan manfaatnya, di dunia dan akhirat.

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat

menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠﴾ فَادْكُرُوا اللَّهَ الْجَلِيلَ يَذْكُرْكُمْ،
وَأَشْكُرُوهُ عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١١﴾